



**LAUGA AUTU MO LE TATALAINA O LE PAMU PENISINI A LE  
MALO, SIUSEGA APIA SAMOA  
3 OKETOPA 2023**

**AFIGA I LE MINISITA O TUPE, AFIGA MULIPOLA ANAROSA  
ALE – MOLIOO**

Susu lau susuga i le Taitai o le sauniga, lau susuga i le Tausi Matagaluega, lau susuga Rev. Faleiva Faleiva.  
Afio lau afioga i le Sui Palemia ma Minisita a le Kapeneta.  
Afio lau afioga i le Fofoga Fetalai ma le sui Fofoga Fetalai.  
Afio lau afioga i le Taitai o le itu agai ma le mamalu o sui o le Palemene o Samoa.  
Afio Ofisa Sili o Matagaluega uma a le Malo ma le mamalu o le au valaaulia,  
Faapea le ma'ave eseese ua mafai ona tatou faatasi ai i lenei aso ma lona faamoemoe.

O lea ua maea ona momoli lapalapa o malo i le faapolo ma le faasagi i lo tatou Tapa'au Sili i le lagi. E momoli atu ai le faafetai i lau susuga i le Tausi Matagaluega mo le taulaga osia aemaise le upu folafola mo lenei aso. Malo tapena ma ia saga faamanuia Le Atua i lou olaga valaauina aua lana galuega ma le tausia o lana lafu mamoe.

Manatu o lea ua mae'a ona paepae ulufanua paia ma mamalu lo tatou taeao fesilasilafai tusa ai ma le fofoga o le Aso i le taimi ua sola, ma o le a le toe agai ai se faamatalaga aua o outou paia ma mamalu ua taoto lava a o se ala o'o. Ma e le toe i ai se vave po se poto na te toe mafai ona suia, aua o paia mai lava mai le vavau sei ia oo i le faavavau.

Ae tulai atu ma le ava tele, e fai au ma sui a le Afioga i le Tama'ita'i Palemia ma le mamalu a le Kapeneta faapea le

Matagaluega o Tupe, e faaleo ai se tala otooto e tusa ma lenei atinae taua a le Malo e pei ona tatou molimauina i lenei taeao.

O lenei atinae sa amata ona fuafua mai ina ua faatupulaia le tele o taavale a le Malo, faatasi ai ma faafitauli sa tulai mai i le le gafataulimaina lea e Pamu Penisini o manaoga ma galuega moomia a le tatou Malo.

Mo le silafia, o se tasi lenei o auauunaga taua a le tatou Malo ua tele tausaga sa faatino mai ai e oo mai lava ile asō o loo faaauauina pea le utuiina lea o taavale a le Malo e faaogaina ai nisi o Pamu Penisini Tumaoti. **Ma oute faafetaia ai le faiga paága a le tatou Malo ma le Pesega Service Station faapea le T&N Toleafoa Service Station mo nei auauunaga i tausaga e tele ua tuana'i.**

Peitai o lenei taeao, ua faiva ese lopepe aua o lea ua tatou molimauina le agalelei ma le silisili ese o le Atua, ina ua mafai ona tino mai lenei atinae aua le manuia ma le sologa lelei o galuega fai ma le tautua a le tatou Malo mo ana tagata.

O le tau atoa o lenei Polokeiti e \$3 miliona tala ma sa faatupeina uma lava e le tatou Malo. O lenei tau e aafia ai le 1 eka atoa o le fanua, o le afa ( $\frac{1}{2}$ ) eka o loo iai le pamu penisini, ofisa, faapea ma nisi o fale o le a fuafuaina e teu malu ai faamaumauga a le Matagaluega o Tupe, o le isi afa eka i tua e le o nofoia i le taimi nei, o loo ua i ai fuafuaaga o le ā faamautū mai ai le vaega o felauaiga tau taavale mo le taligamalo a Samoa mo le fonotaga a Ta'ita'i o Malo o le Taupulega i le tausaga fou.

O lenei pamu penisini e fa (4) ona Dispensers po'o Pamu faaonopo nei e utu ai taavale. E tolu (3) underground tanks, poó tane i lalo o le eleele mo le teu maluina ai o le tiso ma le penisini - i lona telē e 25,000 lita mo le tiso ma le 15,000 lita mo le penisini.

O lenei pamu penisini ua uma ona fa'atologa ma ausia tulaga uma faaletulafono aemaise lona saogalemu lautele, ina ia malu puipuia ma aua lava nei tulai mai se faalavelave

e ono aafia ai se soifua, aemaise o i latou uma o le ā faaogaina lenei atina'e.

O le taua ma le aoga o lenei atina'e fou a le Malo:

1. O le a faasaoina ai tupe alu fuafua a le Malo mai le lisiina o isi Pamu Penisini tumaoti, mo le faatinoina o ana auaunaga.
2. O le a fesoasoani tele lenei atina'e i le vave tali atu aemaise tulaga o femalagaiga, i taimi o Faalavelave Faafuasei e aafia ai Lologa, Afa, Mu ma isi lava mala faalenatura e ono tulai mai ma aafia ai si o tatou atunuu.
3. O le a faafaigofie le faatinoga o le auaunaga i le mafai lea, ona tali atu i manaoga a Matagaluega uma aemaise le faatupulaia pea o taavale a le tatou Malo.
4. O le mafai lea ona utu tasi uma iinei, o taavale e aafia ai loa ma Faalapotopotoga Tumaoti ma isi Ofisa a le Malo i se taimi o i luma.

O nisi ia o vaega sa taula'i ma silasila mamao ai le tatou Malo aua le taumafai mai o lenei atinae tāua. E momoli ai le agaga faafetai i le tatou Malo, i lau afioga le Tamaitai Palemia faapea le Kapeneta mamalu mo le lagolagoina o lenei atina'e. E iai le manatu maua luga, o le a tele le sao ma le taua o lenei atinae mo femalagaiga, aemaise le utuina o taavale uma a le tatou malo aua ana galuega fai i aso uma.

E ia te au le ava tele oute valaau atu ai i le Afioga Lautimuia Afoa Uelese Vaai, e fai ma'ua ma sui o le Malo, e ooti ina le lipine e tatala aloaia ai le Pamu Penisini a le Malo.

Ia alofa mai le Atua ma ia saga famanuia i lenei atinae ma lona fa'aogaina.

Soifua ma ia Manuia